



3. august 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqquutit:

- 1. Naalakkersuisut qanoq naatsorsuutigaat ulloq 1. septembari 2018 Peqqinnissaqarfik tamakkiisumik ingerlalersinnaassasoq malunnarmat nakorsat 43- t amingaataasut kiisalu qaavtigut peqqissaasorpasuarunik atorfeqavissunik amingaateqartoqartoq.**
- 2. Naalakkersuisut isumaat naapertorlugu peqqinnissaqarfik tamakkiisumik ingerlasoq sunaava, malunnarmat naatsorsuutigineqartoq 1. septembari 2018 aallarnerfigalugu tamakkiisumik ingerlasoqalerumaartoq uffa nakorsanik peqqissaasunillu amerlasuunik amingaateqartoqaraluartoq?**
- 3. Apeqquutinnut 154/2018-miittunut akissummi nalunaarutigineqarpoq paarlattaasartut allaffianneersut peqqissaasut 33-t kiisalu nakorsat 7-t atorfeqartinneqartut, takuuk apeqquut 2-mut akissut. Apeqquummut 3-mut akissummi oqaatigineqariataarpoq, paarlattaasartut allaffianneersut peqqissaasut nakorsallu 44-t atorfeqartinneqartut. Qanoq ilillunga paasissutissat tatigisinnaavakka, oqaatigineqartummi naapertuutinnimmata, suna eqqortuuva?**
- 4. Naalakkersuisunut nassuiaqquneqarpoq napparsimasut isumannaatsuunissaat qanoq paasineqarsimanersoq apeqquutinnummi 154/2018-miittunut akissutini oqaatigineqarmat sulisussaaleqineq napparsimasunut sunniuteqanngitsoq naak nassuerutigineqareeraluartoq misissugassat katsorsarneqartussallu aggersarneqarnissaat allatut ajornartumik kinguartinneqartariaqarsimasoq?**
- 5. Apeqquutinnut 154/2018-miittunut akissutini Naalakkersuisut oqaatigaat Dronning Ingriduo Napparsimavissuani siniffiit 11-nik amerlassusillit atorunnaarneqarsimasut sulisussanik amingaateqarneq pissutaalluni. Erseqqinnerusumik akineqarusuppunga, ersersillugu immikkoortortaqarfinni assigiinngitsuni ataasiakkaani siniffiit qassit atorunnaarneqarsimanersut.**
- 6. Apeqquutinnut 154/2018-miittunut akissummini Naalakkersuisut oqaatigaat, peqqinnissaqarfik sipaaqquneqarsimanngitsoq taamaakkaluartorli aningaasaqarnikkut ilungersunartorsiornerup nassataanik ataavartumik ineriartortitsinissaq pisariaqartoq kiisalu pisariillisaasoqartuartariaqartoq aningaasat atugassiissutigineqartut iluanni. Tassunga atatillugu kissaatigaara paasissallugu Naalakkersuisut qanoq isumaqarnersut oqaatigineqarmat pisariillisaasoqarsinnaasoq Peqqinnissaqarfillu ineriartortinneqarsinnaasoq peqataanillu suliniutinik annertusaanissat taamatullu ineriartortitsinissat kingullinneqartartut.**
- 7. Apeqquutinnut 154/2018-miittunut apeqquut 8-mut akissummi paasivara Naalakkersuisut**



pilersaaruteqanngitsut akuersissutinut piunasaqaatinik qasukkaanissaminnut. Tamanna iluamik paasisimanerpara? Taamaakkaluarpalluunniilli Naalakkersuisut qinnuiginiarpakka sulisussaaleqineq qaangerniarlugu piffissaq qaninnerusoq ungasinnerusorlu isigalugu pilersaarutitik allaasissagaat. Ilinniartitsinerummi iluani suliniutit innersuussutiginnarneqarnerat akissutitut tamakkiisutut isiginngilara
(Inatsisartunut ilaasortaq Malene Vahl Rasmussen, Demokraatit)

Tunngavilersuut

Naalakkersuisut ulloq 27/7 apeqqutinnut 154/2018-miittunut akissumminni Peqqinnissaqarfimmi paarlattaasartut ilaatigut eqqaavaat. Akissutinut qujavunga peqataanilli paasillugu akissutigineqartunut arlalinnik apeqquteqaqqittariaqarlunga, isumaqarama akissutaasut pissutsinut piviusunut naapertuutinnngitsut.

Assersuutigalugu eqqumiippoq Naalakkersuisut naatsorsuutigimmassuk Dronning Ingridip Napparsimavissuani tamakkiisumik ingerlaqqittoqalerumaartoq ulloq 1. septembari 2018 aallarnerfigalugu, Naalakkersuisummi peqataanik oqaatigimmassuk nakorsat 43-t amingaataasut kiisalu peqqissaasunut atorfiit suli amerlanerusut.

Tamatuma saniatigut akissutini oqaatigineqartut paasissutissat eqqorsinnaanngillat. Akissummi allaaserineqarpoq peqqissaasut 33-t paarlattaasartut allaffiat aqqutigalugu atorfeqartinneqartut taamatullu aamma paarlattaasartut allaffiat aqqutigalugu nakorsat 7-t atorfeqartinneqartut, taamaasilluni paarlattaasartut allaffiat aqqutigalugu atorfiit 40-t inuttaqartinneqarput. Apeqqummut allamut akissummi oqaatigineqarpoq maannakkorpiaq paarlattaasartut allaffiat aqqutigalugu nakorsat peqqissaasullu katillugit 44-t atorfeqartinneqartut. Ataqtigiinngillat - paasissutissiissutigineqartummi tamarmik eqqortuusinnaanngillat.

Tamatuma saniatigut toqqissisimanarinngilluinnarpara Naalakkersuisut akissumminni oqarmata sulisussaaleqinermit napparsimasut eqqorneqarsimanngitsut peqataanillu allallutik, sulisussaaleqinerup kinguneranik napparsimasut katsorsarneqartussat misissorneqartussallu aggersarnissaat kinguartikkallarneqarsimasoq. Uanga isumaga naapertorlugu napparsimasut soorunami eqqorneqarput pisariaqartitaminnik misissorneqarnissaraluaminnut katsorsarneqarnissaraluaminnullu aggersarneqarsinnaasimanngikkunik. Kisianni aamma imaassinnaavoq napparsimasut isumannaatsuunissaannut Naalakkersuisut uanniit allaanerusumik isumaqartut.

Piffissarititaasut ullut sulliviit qulit iluanni apeqqutinnut akissutit tigunissaannut qilanaarpunga.